

# La Beade Benvignude Boian di Cividât

Tal MAN, museu archeologjic di Cividât, la presince di un preseôs vêl leât al so non.

Viers la mitât dal Dusinte, cu la sucession dal patriarcje Gregori di Montlungje a Pertold di Andechs, e rive insom la rieste dai patriarcjis todescs e e scomence chê dai talians. Chest mudament al ve consequencis une vore impuartantis, no dome par chel che al inten la linie politiche, ma in dute la vite dal principât furlan. Ancje in cjamp religjôs al è pussibil vualmâ dai cambiaments no divignints dome da casuâls coincidencis. Cussì, par esempi, sul scomençâ dal patriarcjât guelf si assist a un ciert discjadiment des badiis e dai munistîrs benedetins e agostinians presints inte jurisdizion ecclesiastiche di Aquilee, che a jerin stâts fondâts e favorîts dai patriarcjis todescs (Sest, Sumaghe, Rosacis, S. Martin de Beligne, Mueç, Arnoldstein, Eberdorf. S. Pauli in Lavantal, S. Marie in Val, Michelstetten, e v.i.) mentri dutun in chel a vignivin tirâts sù convents francescans e dominicans. Religjôs furlans a jerin presints sedi intai prins che intai seconts. Ma, biel che intai antîcs si incuintravin ancje un grant numar di todescs, intai gnûfs si incuintravin ancje tancj numerôs talians rivâts chenti des plui diviersis regjons: sevi chei che chei altris pal plui clamâts dai patriarcjis. I prins "lûcs" dai Fraris Minôrs in Friûl a forin chei di Glemone e di Cividât, tirâts sù viers la mitât dal secul. Pôc daspò (1266) il patriarcje Gregori al consacrave la glesie di S. Francesc a Udin e tal 1294 il so sucessôr Raimont de Tor al faseve costruî il convent des clarissis, graziis al sostegn economic dal citadin Uccellutto de Ucellis. Mentri il francescan Fulchîr, vescul di Concuardie, indi fondave un altri dongje la sô sede e altris inmò a vignirin tirâts sù a Sacîl, a Gurize, a Triest e inte Istrie. Ancje i dominicans a costruîrin un convent maschîl a Cividât viers il 1252 e un feminîl tal 1267 e a jentrarin a Udin tal 1285. Evidentementri i doi Ordins a rispuindevin miei dai antîcs, no dome ae clime religjose de ete, ma ancje ae gnove direzion politiche gjenerâl dal patriarcjât.

Inte comprensibil rivalitât fra chescj Ordins, al semee che Cividât e sedi stade par cetant timp il puest dulà che a vevin la primazie i dominicans. E par vie che e je cognossude la facilitât che, dilunc il secul daspò, si multiplicarin inte leterature dedicate ae vite dai sants lis fantasiis e lis esagjerazions sul cont di presumûts fats straordenaris, no po fâ nissune maravee che la gare tra i Minôrs e i Predicjadôrs si sedi a voltis davuelte ancje a colps di meracui. E je une cjosse, cheste, che bisugne tignî presint cuant che si metisi a lei la vite de terziarie dominicane di Cividât Benvignude di Boian, come che nus ven contade dai biografs dal Ordin. In fats si trate inte plui part dai câs di esagjerazions fûr dal vade. Cussì che, ancje par une plui rispjetose memorie de stesse Beade, al è dal sigûr miei racuei di altris fonts chei pôcs riferiments biografics che nus puedin ofrî.

Da un Conrât di Pertiche, che al risulte presint a Cividât tal 1218, e da un Indrî, forsit so fradi, al semee che a vevin vût origine dôs fameis nobilis di chê

citât: i Boians e i Tassots. A ogni bon cont, un Conrât di Vecelon, clamât Boian, che al murî tal 1280 e che al fo ancje gastalt di Cividât, si propon come personaç di grande impuartance e di grant credit in diviers documents dal timp. Di chest om e di une Albertine di Butinins e nassè a Cividât, tal 1255, tierce di dîs fiis, la Beade Benvignude. Dai siei fradis un, Jacum, al fo dominican e dôs sûrs a forin muiniis a Cividât: une parimentri dominicane, in S. Marie de Cele, chê altre badesse di S. Marie in Val, Benvignude invezit, forsît par vie che e jere maladice, si inscrivè dome al Tierç Ordin di S. Domeni, i cui membri a restavin a vivi a cjase lôr, rispîtant dut câs un complès di prescrizion morâls e di praticis devozionâls, che a podevin jessi davueltis ancje fûr dal convent.

Dilunc la sô no lungje e tribulade esistence, Benvignude e cuistà une innomine di grande virtût e soledut di largje gjenerositât pes donazions, che la situazion asiade de famee e la disponibilitât al donâ dal pari i permetevin di fâ.

Di achî e divignî la grande venerazion, che e continuà ancje daspò de muart. E murî juste apont a 37 agns, ai 30 di Otubar dal 1292, e e ve subite un slargjât cult populâr inte sô citât e inte interie Regjon. Il cardinâl patriarcje Danêl Dolfin al istruì tal 1759 il regolâr procès di beatificazion, che si sierà l'an daspò cuntune bole dal pape Clement XIII, dulà che al vignive uficialmentri aprovât il cult public ae Beade.

Al so non e je leade de tradizion une origjinâl e preseose opare di art: il cussî clamât "vêl de Beade Benvignude" che al è un linçûl lunc oltri cuatri metris e dut ricamât in blanc. Al fo conservât, fint a cualchi deceni indaûr, inte glesie di S. Pieri ai Volts biel che cumò si cjate esponût tal museu archeologjic di Cividât. Si trate di un vêr tesaur, un lavôr di infinide sapience e pazienze, di grande raritât tal so gjenar: un autentic tratât practic de art dal ricam de Ete di Mieç, dulà che si puedin studiâ une infinitât di ponts, di motîfs, di soluzions decorativis, tant che al semee inverosimil che une sengule persone, ancje lavorant intor dute la vite, e puedi vêlu realizât. Tal centri al è rapresentât un Crocifis tra la Virgjine, San Zuan, la Madalene e S. Lisabete. Sui ôrs, a grups di trê, e disponûts su dôs filis, si cjatin i apuestui e altris sants. La composizion iconografiche e je aduncje chê di une ancone di altâr dal gjenar di chês di San Marc a Vignesie, de catedrâl di Grau e dal stes domo di Cividât. In dut il lavôr al è evident il gust patriarcjin locâl. Ma ce che plui al incjante al è il vêr sens de art che al da vite a cheste opare maestre: art sclete e sincere che e diven di une sconfinade devozion.

(Josef Marchet – da "Friuli: uomini e tempi" – test ridusût e voltât par furlan par cure de redazion di Ladins dal Friûl – Novembar 2014)